



**Velferðarnefnd Alþingis,
Nefndasvið Alþingis**

Reykjavík, 10. desember 2020

Varðar: Frumvarp til laga um launagreiðslur til íþróttafélaga vegna launakostnaðar á tímum kórónuveiru-faraldurs, 362. mál

Vísað er til tölvupósts frá Velferðarnefndar Alþingis, dags. 4. desember sl., þar sem óskað er eftir umsögn ÍSÍ á ofangreindu frumvarpi til laga.

Íþrótt- og Ólympíusamband Íslands fagnar framkomnu frumvarpi enda afar miklir hagsmunir í húfi fyrir íþróttahreyfinguna í landinu. Það er gríðarlega mikilvægt, ekki síst í þeim aðstæðum sem nú eru uppi, að íþróttastarfið nái að halda áfram af sama krafti og áður þegar sóttvarnaráðstöfunum verður aflétt. Til að það geti orðið að veruleika þarf stuðningur frá ríkinu að koma til og framkomið frumvarp er mikilvægur hlekkur í þeirri vegferð.

Íþróttahreyfingin stóð frammi fyrir fjöldauppsögnum starfsmanna þegar fregnir bárust af stuðningi ríkisins í formi launagreiðslna og urðu þær fréttir til þess að fyrirhuguðum uppsögnum var frestað og vonandi forðað. Ef til uppsagna hefði komið þá hefði hreyfingin glatað mikilvægu starfsfólki og verið mun verr í stakk búið að mæta þörfum iðkenda þegar keyra þarf upp starfið í fullan gang að nýju.

Frumvarpið nær eingöngu til launþega en ekki til sjálfstætt starfandi aðila í íþróttahreyfingunni.

Íþrótt- og Ólympíusamband Íslands telur að út frá jafnræðissjónarmiðum sé heppilegra að frumvarpið nái einnig til sjálfstætt starfandi aðila í íþróttahreyfingunni þar sem laun og greiðslur til sjálfstætt starfandi aðila eru mjög mismunandi á milli félaga allt frá því að vera hátt í 100% laun og 0% greiðslur til sjálfstætt starfandi og öfugt og allt þar á milli. Því væri jafnræðis best gætt með því að sömu reglur giltu um hvoru tveggja.

Þá er rétt að benda á að margir hafa stoppað við texta í greinargerð sem segir um 5. grein:

„Er þannig gert ráð fyrir að aðeins geti komið til greiðslna vegna þeirra launamanna sem koma beint að íþróttastarfi sem fellt hefur verið tímabundið niður, svo sem íþróttafólks og þjálfara sem eru á launaskrá hjá hlutaðeigandi íþróttafélagi. Er því ekki er gert ráð fyrir að til greiðslna geti komið vegna annarra starfsmanna en þeirra sem koma að umræddu íþróttastarfi, enda geti slíkir starfsmenn sinnt starfi sínu með hefðbundnum hætti þrátt fyrir opinberar sóttvarnaráðstafanir en hér er m.a. átt við starfsfólk á skrifstofu íþróttafélags.“

Einhverjir hafa skilið þessa skýringu þannig að skilja eigi mjög þröngt hvaða störf innan íþróttahreyfingarinnar falla undir skilgreiningu 5. gr. frumvarpsins. Mikilvægt er að það sé skýrt að öll störf innan íþróttafélaga snúast um æfingar og keppni í íþróttum. Það sem





skiptir máli varðandi efni þessa frumvarps er að undanskilja þá sem hafa verkefni til að vinna þó að æfingar og keppni liggja niðri. Störf á skrifstofu geta t.d. lagst af þegar lokað er fyrir æfingar og keppni t.d. þau sem lúta rekstri afreksflokka og umsjón með starfi yngri flokka.

ÍSí vill því áréttta að nauðsynlegt er að frumvarpið nái yfir allt starfsfólk íþróttahreyfingarinnar sem æfinga- og keppnistakmarkanir hafa áhrif á.

Ef nánari upplýsinga eða skýringa er þörf, vinsamlegast hafið samband við undirritaða.

**Með kveðju,
ÍÞRÓTTA- OG ÓLYMPÍUSAMBAND ÍSLANDS**

Líney Rut Halldórsdóttir
framkvæmdastjóri

